

# Dua dana bantu pertanian

PM mahu petani kurang berdaya maju beralih kepada kegiatan lebih menguntungkan

**K**UALA LUMPUR: Kerajaan melalui Khazanah Nasional dan Bank Negara Malaysia akan menyediakan dua dana berjumlah RM400 juta bagi memajukan industri pertanian negara, kata Datuk Seri Abdullah Ahmad Badawi.

Perdana Menteri berkata, Khazanah Nasional akan menubuhkan dana pertanian sebanyak RM200 juta sebagai modal teroka bagi membiayai projek pertanian baru yang menggunakan teknologi intensif.

Abdullah yang juga Menteri Kewangan, berkata dana itu disumbangkan secara bersama oleh kerajaan, Khazanah Nasional dan sektor swasta.

Beliau berkata, Bank Negara juga akan menyediakan satu lagi dana pertanian bernilai RM200 juta yang akan digunakah untuk membiayai projek pertanian dan penternakan bersepadu.

Perdana Menteri menyeru petani yang terbabit dalam sektor pertanian yang kurang berdaya maju, seperti aktiviti menanam tembakau di Kelantan, agar beralih kepada aktiviti pertanian

yang lebih menguntungkan.

"Beberapa kegiatan sektor pertanian kini tidak lagi menjadi kegiatan yang berdaya maju seperti penanaman tembakau terutamanya Kelantan.

"Oleh itu, adalah wajar bagi petani dalam bidang berkaitan beralih kepada tanaman atau industri lain yang berpotensi menghasilkan pendapatan lebih tinggi," katanya.

Perdana Menteri berkata untuk memudahkan peralihan itu, mereka akan diberi akses kepada kemudahan pembiayaan termasuk dana yang diuruskan oleh Bank Pertanian.

Abdullah juga mahukan koperasi memainkan peranan dalam beberapa projek besar pertanian dan menyeru pengusaha projek pertanian, terutama di luar bandar, memilih koperasi sebagai rakan kongsi.

Beliau berkata kerajaan menyediakan peruntukan RM3.6 bilion dalam Bajet 2007 untuk sektor pertanian bagi meningkatkan produktiviti dan kecekapan pengeluaran hasil pertanian serta menambah keupayaan pemasaran.



HASIL NEGARA: Sektor pertanian mendapat peruntukan besar pada Bajet 2007 untuk membantu petani yang kurang berdaya maju.